

Pairimoni peba owera ie Pauro ro gemeiriai-ro

¹ Mo masiro Pauro ie, Iesu Keriso sapuwo to urubia na-nimowautiti dibura to nou mabu ato norobai-rimo. Nimo badi neama Timoti nedi peba titi ro nou mutu nisioidiro-rido. Pairimoni neitiro oro aboto auna ia nirimagare ie, oro ata nou se ie neibi ro badi to nisioidirotiti-bimo mea owera urubia na-nimowautiti-bimo.

² Neitiro ata kimibiria medera Apia oro aboto kamade owera ibose to nemeiriai-do. Akipasi oro neitiro urio boso koroho boinana ie Iesu Keriso sapuwo to, oro aboto kamade owera nemeiriai-do.

Ina Iesu patu urubia Pairimoni oro moto ato etio ro iradabutiti-dumo, nio aboto ibose to nemeiriai-do kamade owera.

³ Wisa tato kiwarebai, miro mutu nimo Abera Godi, Abera Naramu Iesu Keriso mutu neitiro aboudo na-ororuwotiti-die, Pairimoni oro abato aise ba-miamotiti.

Pauro kararatoro owera ie Pairimoni sapuwo to

⁴ Oro sapuwo to mo ro Godi aboto na-nararatorotiti, oro mo ro keba moro to naremotiti eso owera aise niarotiti imese sirio tau.

⁵ Mabu oro sapuwo to owera mo ro ta-nirorowai ibo Abera Naramu Iesu edi mea owera ro oro ro na-gimibiria koko se torobidiro. Ina ata mabu nou e, Iesu edi tarena urubia ro neio imese oro ro nirimagare imatititi.

⁶ Oro modobo ie borubi kimibiria urubia mutu naminiramio sosoro koroworohuti, ina Iesu aboudo edi meana ro na-niauri-dumo, io iedi umoro ro oro abato mea se ba-mosuruwo-ro.

⁷ Neama, Godi urubia oro ro nirimagare na-imatititi, mo oro ro kamade nowaititi ibose pupuwo nowaititi. Auna mabu nou e, Godi edi tarena urubia ro oro ro kimibiria pupuwo beda sosoro imowaititi.

Pairimoni Pauro ro gemagege Onesima sapuwo to

⁸ Iesu Keriso pupuwo korosa mo abato towamo oro mo ro kemowapotai sekere ie mea tanaro osioidiro ri.

⁹ Kaupoti oro mo ro a-nemagege nedi tanaro ro osioidiro ri nirimagare maumo ato.

Mo Pauro ie, mo abora oromano buro ie. Iesu Keriso sapuwo to urubia na-nimowautiti dibura ato nou mabu ato norobai-rimo.

¹⁰ Oro mo ro a-nemagege Onesima sapuwo to, nu mo karasomai mere sosoro ie. Mabu nu dibura abato na-irohotiti Iesu Keriso gabo ato mo ro nowotobowa.

¹¹ Keba se oro Onesima ro mea se owarebai pua. Abora mo nou ro mea se nowarebai, ina oro ido nou ro mea se ama-owarebai-ri.

¹² Onesima natonato buro ie abora oro aboto noti nemeiriai. Nu mo giropu mere ie,

¹³ mo ubi ie nou mo abato se kateidiro. Nu mo ro korobiro sekere ie nato oro bobo ato mo kowarebai aboto, mo dibura ato na-nimidirotiti Iesu sapuwo to.

¹⁴ Kaupoti mo ubi tato ie mo nakara se ata tanaro ata kosioidiro Onesima sapuwo to. Oro mo ro emediawado-ri pua mea kowarebai

tanaro osioidiro ri, modobo ie oro ia simara ubi
ato kosioidiro.

¹⁵ Mabu boira oro Onesima ro egea mere se
na-gemeserai? Etu umoro ra oro aboto
orowameai ri, womu tato womu tato oro mutu
iato ama-imidirotiti-ri.

¹⁶ Modobo pua oro ro idaibo kimaragoidiro
koworohuti 'Onesima dorogora wisa tato woko
dubu e.' E e! Morobise ie nu oro wisa tato woko
dubu e, ina abora nu oro morobise neama to
ta-gararapoi, ina nu oro ro nirimagare
ama-ematiti-ri. Nu mo ro na-niaurititi nato, nu
mo morobise neama to nasorotiti, nirimagare
mutu. Kaupoti mo umoro ie, nu oro ro
nirimagare ama-ematiti-ri auna se. Oro kamade
ama-oi-ri wisa tato woko nou ro beda sosoro
ama-emisioidiro-ri. Ibose Abera Naramu
kimibiria maumo ato nu oro neama ie, ina nu
oro ro nirimagare ama-ematiti-ri.

¹⁷ Neitiro ro Iesu woko badi to
nemesioidiro-ri. Mo umoro ie oro abato
idaibo kimaragoidiro tiamo. Ina noudo ie
Onesima oro ro kamade mutu
ba-demaidodorai-ro. Mo oro aboto kou ato mo
oro ro kemaiddorai, Onesima ibo
ba-demaidodorai-ro.

¹⁸⁻¹⁹ *Nedi titi oweri ro mo ro simara tu to
nisioidiro. Oro abato nu doro na-owamo nu
masiro ba-dowagare, ina mo masiro nou bobo ato
ba-dedei, wisa mo ro anama-emowameai-ri.*
Keba se oro mo ro ta-nowarebai Iesu kowasoro
dubu to ararapoi ri. Kaupoti mo ro iatiti-ri pua
ibo oro mo abato nedi auna doro ro towamo.

²⁰ Ina nou mabu ato ie, mo neama buro, nedi
nirimagare tanaro ro modobo ie oro ro
kosioidiro, Onesima aise ba-demaidodorai,

mabu oro mo mutu neitiro atu se Abera Naramu do ie. Modobo ie mo oro ro pupuwo kemowaititi nedi tanaro ro neito, mabu neitiro Iesu Keriso kowasoro dubu teibo ie.

²¹ Oro aboudo modobo ra mo ubi tanaro kosioidiro? Mo nakara se umoro tiamo ibo oro ro ubi to ama-omidai-ri mo ro nedi owerā ro niatiti nou sapuwo to. Ibose mo umoro ie mo edi ubi tanaro ro oro ro kisioidiro to ama-orohodorai-ri.

Pauro koporeai owerā ie

²² Mo oro aboto simara se tinama-ou-ri mo kutuwa moro nou se ba-demododiai. Mabu mo auna se ti-nimaragoidiroiti ibo mo dibura rido kosuruwo ie, ina nio mo ro nato nama-iraturiomai-ri. Mabu mo umoro ie mo sapuwo to nio ro Godi auna se tararatorotiti-dumo mo dibura aboudo kosuruwo sapuwo to.

²³ Mo mutu edi dibura dubu ro irohotiti Epapara, nou ro mea owerā urubia na-imowautiti Iesu sapuwo to, nou ro ibose kamade owerā emeiriai oro aboto.

²⁴ Ibose kamade owerā nedi urubia ro neibi ro emeiriai-bimo oro aboto Mareko, Arisitaka, Demasi, Ruka. Nedi na peteibi ro mo neibi ro nowarebidirotiti-bimo mea owerā Iesu sapuwo to urubia kimowauti aboto.

²⁵ Abera Naramu Iesu Keriso edi wisa tato kiwarebai ro nio abato aise ba-mowamotiti. Nou se ie.

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4